

Meeqqat atuarfianni angajullit atuartinneqarnerini MMS imaluunniit nittartakkakut naapittarfikkut tamataqanngitsunik assinik avitseqatigiittarnermut tunngasunik paasissutissiisarneq eqqunneqarnissaannut Naalakkersuisut peqquneqarnissaannut aalajangiiffigisassatut siunnersuut.

(Inatsisartunut ilaasortaq Tillie Martinussen, Demokraatit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerinnineq

Tillie Martinussen, Demokraatit, internetikkut attaveqaatini oqarasuaatigullu angallattakkatigut tamataqanngitsunik assinik avitseqatigiittarnermik ajornartorsiummik ukkataqalersitsinera pillugu Naalakkersuisut qutsavigaat.

Naalakkersuisut isumaqarput meerartatta internetti attaveqaatillu nutaaliat allat atorlugit attaveqartarnermik ilinniartinneqarnissaat pingaaruteqartorujussuusoq. Suut avammut saqqummiunneqarsinnaanerisa suullu inuup nammineq pigisassaasa killingi meeqqat inuusuttullu ilinniassavaat, aammalu meeqqat inuusuttullu killigititaat namminerlu pigisaat inuit attaveqaqatigiittarfianni innarlerneqarsinnaasut ilikkassallugit. Meeqqat inuusuttullu toqqissisimasumik inuunerissaarlunilu peroriartornissamik ineriartornissamillu periarfissinneqassapput – aamma atoqatigiittarnermi ineriartornermi, aammalu innarlerneqaratik atornerlunneqaratillu inuuneqarnissamik periarfissinneqassallutik. Taamaammatt inuit allat atoqatigiittarnermi ileqqorissaarnermilu killingisa ataqqineqarnissaannik meerartagut inuusuttortagullu aamma ilinniartissavagut.

Ilaatigut atoqatigiittarnermut tunngasut pillugit meeqqat oqaloqatiginissaannut tunngatillgu angajoqqaat isumassuisuunerat perorsaasuunerallu siunnersuuteqartup erseqqissarpaa. Meerartatta ineriartornerat killiffiat tunngavigalugu meeqqat oqaloqatiginissaannut angajoqqaatut pisussaaffeqarpugut. Taamaammatt inuunermi apeqqutit ajornakusoortut pillugit aamma oqaluserisinnaasariaqarpagut, atoqatigiittarneq, misigissutsit, ikinngutiginneq, minnerunngitsumillu internetimiittarneq internetimilu inuit attaveqaqatigiittarfii pineqarpata. Taamatut oqareerlunga siunnersuuteqartoq ilumoorpoq inersimasut ilaasa tamakku pillugit meeqqamik oqaloqatiginissaat ajornakusoortissinnaasaraat.

Kinguaassiorneq pillugu ilinniartitsineq Meeqqat Atuarfianni qaffasissutsini tamani ilinniartitsissummi Inuttut Ineriartornermik ilinniartitsinerup ilaatut pinngitsoorani ilinniartitsissutigineqartussaareerpoq. Sammisat assersuutigalugu ”akiniaaniarluni assinik atoqatiginnermut tunngasunik imalinnik siammarterineq” aamma ”nalunaarutininik atoqatigiinnermut tunngasunik nassiussineq” ilikkagassatut anguniakkami ”pisut

nuanninngitsut ulorianartullu pinngitsoorniarnissaasa nakkutiginnissaat” nalinginnaasumik ilaasinnaapput. Sammisalli taaneqartut digitalikkut pissusiupput, ullumikkut ilinniartitsissutinut pilersaarutini toqqaannartumik allassimannngitsut: sammisalli taaneqartut pimmatiginnittarneq pillugu pinngitsoorani sammisarineqartussamik ilinniartitsinermi inuit attaveqatigiittarfiini pimmatiginnittarneq nalinginnaasumik ilanngunneqarsinnaavoq.

Atuarfik pillugu inatsimmik nutartikkamik Inatsisartut 2017-imi ukiakkut ataatsimiinneranni Naalackersuisut ilisimaneqartutut saqqummiussinissaq pilersaarutigaat. Tassunga atatillugu aamma pilersaarutaavoq alloriarfinni siunertat atuartitsissutit siunertaat aamma ilikkagassatut anguniagassat pillugit nalunaarut atuartitsinermi anguniakkat nutaat ilanngullugit nutarterneqassasoq – aamma ilinniartitsissummi inuttut inerikkiartorneq. Siunnersuut Naalackersuisut taamaalillutik taperserpaat, sammisarlu nalunaarutip taaneqartup nutarternissaani ilanngunniarlugu.